



'Kanite se toga, to je pokvareno i truhlo.'

Džabir ibn Abdullah, radijallahu anhu, rekao je: "Bili smo u jednoj vojnoj akciji, pa je jedan muhadžir udario nekog ensariju. Ensarija povika: 'O ensarije!', a muhadžir povika: 'O muhadžiri!' To je doprlo do Allahovog Poslanika, sallallahu alejhi ve sellem, pa je upitao: 'Šta je to?' Nakon što su mu rekli šta se dogodilo, Vjerovjesnik reče: 'Kanite se toga, to je pokvareno i truhlo.'" Džabir je rekao: "Ensarije su u početku bile brojnije kada je Vjerovjesnik, sallallahu alejhi ve sellem, došao u Medinu, a kasnije su muhadžiri bili u većem broju. Tada je Abdullah ibn Ubejj rekao: 'Zar su to uradili? Tako mi Allaha, kada se vratimo u Medinu, jači će iz nje istjerati slabijeg!' Omer ibnul-Hattab, radijallahu anhu, se na to osvrnuo: 'Dozvoli mi, Allahov Poslaniče, da pogubim ovog munafika.' A Poslanik odgovori: 'Pusti ga, ne daj ljudima priliku da govore da Muhammed ubija svoje ashabe.'"

[صحيح] [متفق عليه]

Allahov Poslanik, sallallahu alejhi ve sellem, je otišao u jedan pohod zajedno sa svojim ashabima, muhadžirima i ensarijama, radijallahu anhum. Tada je jedan muhadžir udario jednog ensariju po zadnjem dijelu tijela svojom rukom. Ensarija povika: "Upomoć, ensarije!", a muhadžir povika: "Upomoć, muhadžiri!" To je čuo Allahov Poslanik, sallallahu alejhi ve sellem, pa je upitao o čemu se radi. Pojasnili su mu: "Jedan čovjek od muhadžira udario je jednog ensariju po zadnjem dijelu tijela svojom rukom. Tada je ensarija povikao: 'Ensarije, pomozite!', a muhadžir je povikao: 'Muhadžiri, pomozite!'" Tada je Poslanik, sallallahu alejhi ve sellem, rekao: "Ostavite taj običaj džahilijeta, jer je to odvratna stvar koja nanosi štetu." Radi se o tome da čovjek, iz neznanja i plemenske pristrasnosti, kada ga savlada protivnik, pozove svoj narod da ga pomogne, bio on u pravu ili ne. Džabir je rekao: "Ensarije su bile brojnije kada je Vjerovjesnik, sallallahu alejhi ve sellem, kao muhadžir tek došao u Medinu, a kasnije su ih muhadžiri pretekli u broju." Tada je vođa licemjera Abdullah ibn Ubejj ibn Selul rekao: "Zar je došlo do toga?! Tako mi Allaha, ako se vratimo u Medinu, sigurno će ponosni (misleći na sebe i svoje sljedbenike) istjerati ponižene (misleći na Vjerovjesnika i njegove sljedbenike) iz Medine!" Omer ibnul-Hattab tada reče: "Dozvoli mi, Allahov Poslaniče, da ubijem ovog munafika!" A Poslanik mu je odgovorio: "Pusti ga, neka ljudi ne govore da Muhammed ubija svoje sljedbenike, makar i po vanjštini."

النجاة الخيرية
ALNAJAT CHARITY

